

卷六十九

白氏文集卷第一

諷諭一 古調詩五言 九六十五首

怨兩詩

皇帝嗣寶曆元和三年冬自冬及春暮不

雨旱蝗々々上心念下民懼歲成災凶遂下

罪已 殷勤告萬邦帝曰予一人繼天承

祖宗 勤不遑寧夙夜心忡々元年誅劉

巴邛二年戮李錡不戰安江東

德邊有魏々功或者天降沴無

書名 白氏文集七十一卷 元和中
那波道圓活字印本
撰者 唐白居易 撰
卷 卷六十九
內容分類 集 別集 唐五代 中唐
叢書號 貴重-36
編號 D7163600

東洋文化研究所漢籍目錄 編號: D7163600

東洋文化研究所漢籍目錄所藏漢籍善本全文影像資料庫 叢書號: 貴重-36

漢籍善本全文影像資料庫文本白氏文集七十一卷 元和中那波道圓活字印本

版權所有: 東京大學東洋文化研究所

使用上的注意事項



白氏文集卷第六十九

半格詩 律詩附 凡九十五首

立秋夕涼風忽至炎暑稍消即事詠

懷寄汴州節度使李二十尚書

嫋嫋簷樹動好風西南來紅釭霏微滅碧
幌飄飄開披襟有餘涼拂簟無纖埃但喜
煩暑退不惜光陰催河秋稍清淺月午方
徘徊或行或坐卧體適心悠哉美人在浚
都旌旗繞樓臺雖非滄溟阻難見如蓬萊

蟬迎節又換鴈送書未迴君位日寵重我
年日摧頽無因風月下一舉平生盃

開成二年夏聞新蟬贈夢得

十載與君別常感新蟬鳴今年共君聽同
在洛陽城噪處知林靜聞時覺景清涼風
忽嫋嫋秋思先秋生殘槿花邊立老槐陰
下行雖無索居恨還動長年情且喜未聾
耳年年聞此聲

題牛相公歸仁里宅新成小灘

平生見流水見此轉留連况此朱門內君
家新引泉伊流決一帶洛石砌千拳與君
三伏月滿耳作潺湲深處碧磷磷淺處清
濺濺碕岸東嗚咽沙汀散淪漣翻浪雪不
盡澄波空共鮮兩崖灑瀕口一泊瀟湘天
曾作天南客漂流六七年何山不倚杖何
水不停船巴峽聲心裏松江色眼前今朝
小灘上能不思悠然

春日閑居三首

陶士愛吾廬吾亦愛吾屋屋中有琴書聊
以慰幽獨是時三月半花落庭蕪綠舍上
晨鳩鳴牕間春睡足睡足起閑坐景晏方
櫛沐今日非十齋庖童饋魚肉飢來恣食
歡冷熱隨所欲飽竟快搔把筋骸無檢束
豈徒暢支體兼欲遺耳目便可傲松喬何
假盃中渌

又一首

廣池春水平群魚恣游泳新林綠陰成衆

鳥欣相鳴時我亦瀟灑適無累與病魚鳥
人則殊同歸於遂性緬思山梁雉時哉感
孔聖聖人不得所慨然歎時命我今對鱗
羽取樂成謠詠得所仍得時吾生一何幸

又一首

勞者不覺歌歌其勞苦事逸者不覺歌歌
其逸樂意問我逸如何閑居多興味問我
樂如何閑官少憂累又問俸厚薄百千隨
月至又問年幾何七十行欠二所得皆過

望省躬良可媿馬閑無羈絆鶴老有祿位
設自爲化工優饒只如是安得不歌詠默
默受天賜

小閣閑坐

閣前竹蕭蕭閣下水潺潺拂簾卷簾坐清
風生其間靜聞新蟬鳴遠見飛鳥還但有
巾掛壁而無客叩關二疏返故里四老歸
舊山吾亦適所願求閑而得閑

遊平泉宴浥澗宿香山石樓贈座客

逸少集蘭亭季倫宴金谷金谷太繁華蘭
亭闕絲竹何如今日會浥澗平泉曲盃酒
與管絃貧中隨分足紫鮮林笋嫩紅潤園
桃熟採摘助盤筵芳滋盈口腹閑吟暮雲
碧醉舞春草綠舞妙艷流風歌清叩寒玉
古詩惜晝短勸我令秉燭是夜勿言歸相
携石樓宿

池上幽境

裊裊過水橋微微入林路幽境深誰知老

身閑獨去行行何所憂
遇物自成趣平滑
青盤石叵密綠陰樹
石上一素琴樹下雙
草屨此是榮先生坐禪三樂處

夏日閑放

時暑不出門亦無賓客至
靜室深下簾小
庭新掃地褰裳復岸幘
閑傲得自恣朝景
枕簟清乘涼一覺睡
午食何所有魚肉一
兩味夏服亦無多
蕉紗三五事資身
既給足長物徒煩費
若比葷瓢人吾今太富貴

和思黯居守獨吟偶醉見示六韻時
夢得和篇先成頗爲麗絕因添兩韻
繼而美之

宮漏滴漸闌城烏啼復歇
此時若不醉爭
奈千門月主人中夜起
妓燭前羅列歌袂
默收聲舞鬟佢赴節
絃吟玉柱品酒透金
盃熱朱顏忽已酡
清奏猶未闋妍詞黯先
唱逸韻劉繼發鏗然
雙雅音金石相磨
和夢得洛中早春見贈七韻

衆皆賞春色君獨憐春意春意竟如何老
夫知此味燭餘滅夜漏衾煖添朝睡恬和
臺上風虛潤池邊地開遲花養艷語懶鶯
含思似訝隔年齋如歡迎春醉何日同宴
遊心期二月二

櫻桃花下有感而作

藹藹羨周宅櫻繁春日斜一爲洛下客十
見池上花爛熳豈無意爲君占年華風光
饒此樹歌舞勝諸家失盡白頭伴長成紅

粉娃停盃兩相顧堪喜且堪嗟

洗竹

布裘寒擁頸氈履溫承足獨立冰池前久
看洗霜竹先除老且病次去纖而曲剪棄
猶可憐琅玕卜餘束青青復籊籊頗異凡
草木依然若有情迴頭語僮僕小者截魚
竿大者編茅屋勿作篲與箕而令糞土辱

新沐浴

形適外無恙心恬內無憂夜來新沐浴肌

髮舒且柔寬裁夾烏帽厚絮長白裘裘溫
裏我足帽暖覆我頭先進酒一盃次舉粥
一甌半酣半飽時四體春悠悠是月歲陰
暮慘冽天地愁白日冷無光黃河凍不流
何處征戍行何人羈旅遊窮途絕糧客寒
獄無燈囚勞生彼何苦遂性我何優撫心
但自愧孰知其所由

三年除夜

晰晰燎火光氤氳酒香嗤嗤童稚戲迢

迢歲夜長堂上書帳前長幼合成行以我
年最長次第來稱觴七十期漸近萬緣心
已忘不唯少歡樂兼亦無悲傷素屏畫居
士青衣侍孟光夫妻老相對各坐一繩床

自題小園

不闔門館華不闔林園大但闔爲主人一
坐十餘載迴看甲乙第列在都城内素垣
夾朱門藹藹遙相對主人安在哉富貴去
不迴池乃爲魚鑿林乃爲禽栽何如小園

拄杖閑即來親賓有時會琴酒連夜開
以此聊自足不羨大池臺

病中宴坐

有酒病不飲有詩慵不吟頭眩罷垂釣手
痺休援琴竟日悄無事所居閑且深外安
支離體中養希夷心窓戶納秋景竹木澄
夕陰宴坐小池畔清風時動襟

戒藥

促促急景中蠢蠢微塵裏生涯有分限愛

戀無終已早天羨中年中年羨暮齒暮齒
又貪生服食求不死朝吞太陽精夕吸秋
石髓徼福反成災藥誤者多矣以之資嗜
慾又望延甲子天人陰隲間亦恐無此理
域中有真道所說不如此後身如身存吾
聞諸老氏

贈夢得

前日君家飲昨日王家宴今日過我廬三
日三會面當歌聊自放對酒交相勸爲我

盡一盃與君發三願一願世清平二願身
強健三願臨老頭數與君相見

逸老

白日下駸駸青天高浩浩人生在其中適
時即爲好勞我以少壯息我以衰老順之
多吉壽違之或凶夭我初五十八息老雖
非早一閑十三年所得亦不少况加祿仕
後衣食常溫飽又從風疾來女嫁男婚了
胸中一無事浩氣凝襟抱飄若雲信風樂

於魚在藻桑榆坐已暮鍾漏行將曉皤然
七十翁亦足稱壽考筋骸本非實一束芭
蕉草眷屬偶相依一夕同棲鳥去何有願
戀住亦無憂惱生死尚復然其餘安足道
是故臨老心冥然合玄造

遇物感興因示子弟

聖擇狂夫言俗信老人語我有老狂詞聽
之吾語汝吾觀器用中劔銳鋒多傷吾觀
形骸內勁骨齒先亡寄言處世者不可苦

剛強龜性愚且善鳩心鈍無惡人賤拾支
床鶻欺擒暖脚寄言立身者不得全柔弱
彼因罹禍難此未免憂患于何保終吉強
弱剛柔間上遵周孔訓旁鑒老莊言不唯
鞭其後亦要軛其先

首夏南池獨酌

春盡雜英歇夏初芳草深薰風自南至吹
我池上林綠蘋散還合頰鯉跳復沉新葉
有佳色殘鶯猶好音依然謝家物池酌對
劣詩成不稱心

官俸初罷親故見憂以詩諭之

七年爲少傅品高俸不薄乘軒已多慙况
是一病鶴又及懸車歲筋力轉衰弱豈以
貧是憂尚爲名所縛今春始病免纓組初
擺落蝟甲有何知雲心無所著圖中殘舊
穀可備歲飢惡園中多新蔬未至食藜藿
不求安師卜不問陳生藥但對丘中琴時

開池上酌信風舟不繫掉尾魚方樂親友
不我知而憂我寂寞

閑居偶吟招鄭庶子皇甫郎中

自哂此迂叟少迂老更迂家計一不問園
林聊自娛竹閒琴一張池上酒一壺更無
俗物到但與秋光俱古石蒼錯落新泉碧
縈紆焉用車馬客即此是吾徒猶有所思
人各在城一隅杳然愛不見搔首方踟躕
玄晏風韻遠子真雲貌孤誠知厭朝市何

必憶江湖能來小澗上一聽潺湲無

亭西墻下伊渠水中置石激流潺湲

成韻頗有幽趣以詩記之

嵌巉嵩石峭皎潔伊流清立爲遠峯勢激
作寒玉聲夾岸羅密樹面灘開小亭忽疑
巖子瀨流入洛陽城是時群動息風靜微
月明高枕夜悄悄滿耳秋泠泠終日臨大
道何人知此情此情苟自愜亦不要人聽
閑題家池寄王犀張道士

有石白磷磷有水清潺潺有叟頭似雪婆
娑乎其間進不趨要路退不入深山深山
太濶落要路多險艱不如家池上樂逸無
憂患有食適吾口有酒醅吾顏恍惚遊醉
鄉希夷造玄關五千言下悟十二年來閑
富者我不願貴者我不攀唯有天壇子時
來一往還

李盧二中丞各創山居俱誇勝絕然
去城稍遠來往頗勞弊居新泉實在

字下偶題十五韻聊戲二君

龍門蒼石壁浥澗碧潭水各在一山隅迢
迢幾十里清鏡碧屏風惜哉信爲羨愛而
不得見亦與無相似聞君每來去矻矻事
行李脂轄復裹糧心力頗勞止未如吾舍
下石與泉甚邇鑿鑿復濺濺晝夜流不已
洛石千萬拳觀波鋪錦綺海珉一兩片激
瀨含宮徵綠宜春濯足淨可朝漱齒遶砌
紫鱗遊拂簾白鳥起何言履道叟便是滄

浪子君若趁歸程請君先到此願以潺湲
聲洗君塵土耳

北窓竹石

一片瑟瑟石數竿青青竹向我如有情依
然看不足况臨北簷下復近西塘曲筠風
散餘清苔雨含微綠有妻亦衰病無子方
老獨莫掩夜窓扉共渠相伴宿

飲後戲示弟子

吾爲爾先生爾爲吾弟子孔門有遺訓復

坐吾告爾先生饌酒食弟子服勞止孝敬
不在他在茲而已矣欲我少愁憂欲我多
歡喜無如醞好酒酒湏多且旨旨即賓可
留多即壘不耻吾更有一言爾宜聽入耳
人老多憂貧人病多憂死我今雖老病所
憂不在此憂在半酣時樽空座客起

閑坐看書貽諸少年

雨砌長寒蕪風庭落秋果窓間有閑叟盡
日看書坐書中見往事歷歷知福禍多取

終厚亡疾驅必先墮勸君少干名名爲錮
身鎖勸君少求利利是焚身火我心知已
久吾道無不可所以雀羅門不能寂寞我

夢上山

夜夢健上山獨携藜杖出千巖與萬壑遊
覽皆周畢夢中足不病健似少年日旣悟
神返初依然舊形質始知形神內形病神
無疾形神兩是幻夢寤俱非實晝行雖蹇
澁夜步頗安逸晝夜旣平分其間何得失

對酒閑吟贈同老者

人生七十稀我年幸過之遠行將路盡春
夢欲覺時家事口不問世名心不思老旣
不足歎病亦不能治扶侍仰婢僕將養信
妻兒飢飽進退食寒暄加減衣聲妓放鄭
衛裘馬脫輕肥百事盡除去尚餘酒與詩
興來吟一篇吟罷酒一卮不獨適情性兼
用扶衰羸雲液洒六腑陽和生四肢於中
我自樂此外吾不知寄問同老者捨此將

安歸莫學蓬心叟曾中分是非

晚起閑行

皤然一老子擁裘仍隱几坐穩夜忘眠卧
安朝不起起來無可作閉目時叩齒靜對
銅爐香暖漱銀瓶水午齋何儉潔餅與蔬
而已西寺講楞伽閑行一隨喜

香山居士寫真詩并序

元和五年予爲左拾遺翰林學士奉詔寫
真於集賢殿御書院時年三十七會昌二

年罷太子少傅爲白衣居士又寫真於香
山寺藏經堂時年七十一前後相望殆將
三紀觀今照昔慨然自歎者久之形容非
一世事幾變因題六十字以寫所懷

昔作少學士圖形入集賢今爲老居士寫
貌寄香山鶴毳變玄髮雞膚換朱顏前形
與後貌相去三十年勿歎韶華子俄成婆
叟仙請看東流水亦變作桑田

二年三月五日齋畢開素當食偶吟

贈妻弘農郡君

睡足支體暢晨起開中堂初旭泛簾幕微
風拂衣裳二婢扶盥櫛雙童舁簟床庭東
有茂樹其下多陰涼前月事齋戒昨日散
道塲以我久蔬素加籩仍異糧魴鱗白如
雪蒸炙加桂薑稻飯紅似花調沃新酪漿
佐以醑醢味閒之椒薤芳老憐口尚羨病
喜鼻聞香嬌驤三四孫索哺遶我傍山妻
未舉案饒叟已先嘗憶同牢盃初家貧共

糟糠今食且如此何必烹猪羊況觀姻族
間夫妻半存亡偕老不易得白頭何足傷
食罷酒一盃醉飽吟又狂緬想梁高士樂
道喜文章徒誇五噫作不解贈孟光

不出門

彌月不出門永日無來賓食飽更拂床睡
覺一嘔伸輕箑白鳥羽新篔簹青箭筠方寸
方丈室空然兩無塵披衣甞不帶散髮頭
不巾袒跣北窻下葛天之遺民一日亦自

足况得以終身不知天壤內目我爲何人

感舊 并序

故李侍郎杓直長慶元年春薨元相公微
之大和六年秋薨崔侍郎晦叔大和七年
夏薨劉尚書夢得會昌二年秋薨四君子
予之執友也二十年間凋零共盡唯予衰
病至今獨存因詠悲懷題爲感舊

晦叔墳荒草已陳夢得墓濕上猶新微之
損館將一紀杓直歸立二十春城中雖有

故第宅庭蕪園廢生荆榛篋中亦有舊書
札紙穿字蠹成灰塵平生定交取人窄屈
指相知唯五人四人先去我在後一枝蒲
柳衰殘身豈無晚歲新相識相識面親心
不親人生莫羨苦長命命長感舊多悲辛

送毛仙翁 江州司馬時作

仙翁已得道混迹尋巖泉肌膚冰雪瑩衣
服雲霞鮮緝髮絲並緻齧容花共妍方瞳
點玄漆高步凌飛烟幾見桑海變莫知龜

鶴年所憩九清外所遊五岳巔軒昊舊爲
侶松喬難比肩每嗟人世入役役如狂顛
孰能脫羈鞅盡遭名利率貌隨歲律換神
逐光陰遷惟余負憂譴憔悴溢江壖衰鬢
忽霜白愁腸如火煎羈旅坐多感徘徊私
自憐晴眺五老峯玉洞多神仙何當憫湮
厄授道安虛辱我師惠然來論道窮重玄
浩蕩八溟闊志泰心超然形骸旣無束得
喪亦都捐豈識椿菌異那知鵬鷖懸丹華

旣相付促景定當延玄功曷可報感極惟
勤拳霓旋不肯駐又歸武夷川語罷倏然
別孤鶴昇遙天賦詩叙明德永續步虛篇
達哉樂天行

達哉達哉白樂天分司東都十三年七旬
纔滿冠已挂半祿未及車先懸或伴遊客
春行樂或隨山僧夜坐禪二年忘却問家
事門庭多草厨少烟庖童朝告鹽米盡侍
婢暮訴衣裳穿妻孥不悅甥姪悶而我醉

卧方陶然起來與爾畫生計薄產處置有
後先先賣南坊十畝園次賣東郭五頃田
然後兼賣所居宅髣髴獲緡二三千半與
爾充衣食費半與吾供酒肉錢吾今已年
七十一眼昏鬚白頭風眩但恐此錢用不
盡即先朝露歸夜泉未歸且住亦不惡飢
食樂飲安穩眠死生無可無不可達哉達
哉白樂天

春池閑汎 已下律詩

綠塘新水平紅檻小舟輕解纜隨風去開
襟信意行淺憐清演漾深愛綠澄泓白撲
柳飛絮紅浮桃落英古文科斗出新葉剪
刀生樹集鸞朋友雲行鴈弟兄飛沉皆適
性酣詠自怡情花助銀盃器松添玉軫聲
魚跳何事樂鷗起復誰驚莫唱滄浪曲無
塵可濯纓

池上寓興二絕

濠梁莊惠謾相爭未必人情知物情懶捕

魚來魚躍出此非魚樂是魚驚
水淺魚稀白鷺飢勞心瞪目待魚時外容
閑暇中心苦似是而非誰得知

宴後題府中水堂贈盧尹中丞

水齋歲久漸荒蕪自愧甘棠無一株新酒
客來方宴飲舊堂主在重歡娛莫言楊柳
枝空老直至櫻桃樹已枯從我到君十一
尹相看自置府來無

和敏中洛下即事

昨日池塘春草生阿連新有好詩成花園
到處鸚呼入驄馬遊時客避行水暖魚多
似南國人稀塵少勝西京洛中佳境應無
限若欲諳知問老兄

送敏中新授戶部員外郎西歸

千里歸程三伏天官新身健馬翩翩行衝
赤日加餐飯上到青雲穩著鞭長慶老郎
唯我在客曹故事望君傳前鴻後鴈行難
續相去迢迢二十年

南侍御以石相贈助成水聲因以絕句謝之

泉石磷磷聲似琴
閑眠靜聽洗塵心
莫輕兩片青苔石
一夜潺湲直萬金

閑居自題戲招宿客

水畔竹林邊
閑居二十年
健常攜酒出
病即掩門眠
解綬收朝珮
褰裳出野船
屏除身外物
擺落世間緣
報曙窓何早
知秋簟最先
微風深樹裏
斜日小樓前
渠口添新

石籬根寫亂泉欲招同宿客誰解愛潺湲
李留守相公見過池上汎舟舉酒話
及翰林舊事因成四韻以獻之

引棹尋池岸移樽就菊叢
何言濟川後相訪
釣船中白首故情在
青雲往事空同時
六學士五相一漁翁

閏九月九日獨飲

黃花叢畔綠樽前
猶有些些舊管絃
偶遇閏秋重九日
東籬獨酌一陶然
自從九月

持齋戒不醉重陽十五年

覽盧子蒙侍御舊詩多與微之唱和
感今傷昔因贈子蒙題於卷後

早聞元九詠君詩恨與盧君相識遲今日
逢君開舊卷卷中多道贈微之相看掩淚
情難說別有傷心事豈知聞道咸陽墳上
樹已抽三丈白楊枝

寒亭留客

今朝閑坐石亭中爐火銷殘樽又空冷落

若爲留客住冰池霜竹雪髯翁

新小灘

石淺沙平流水寒水邊斜插一漁竿江南
客見生鄉思道似嚴陵七里灘

和李中丞與李給事山居雪夜同宿

小酌

憲府觸邪裁豸角瓊闈駁正犯龍鱗那知
近地齊名客忽作深山同宿人一盞寒燈
雲外夜數盃溫耐雪中春林泉莫作多時

計諫獵登封憶舊臣

履道西門二首

履道西門有弊居池塘竹樹遶吾廬豪華
肥壯雖無分飽暖安閑即有餘行竈朝香
炊早飯小園春暖撥新蔬夷齊黃綺誇其
蔽比我盤飧恐不如

履道西門獨掩扉官休病退客來稀亦知
軒冕榮堪戀其柰田園老合歸跛驚難隨
騏驥足傷禽莫趁鳳凰飛世間隱得身人

少今我雖愚亦庶幾

偶吟

人生變改故無窮昔是朝官今野翁久寄
形於朱紫內漸抽身入蕙荷中無情水任
方圓器不繫舟隨去住風猶有鱸魚蓴菜
興來春或擬往江東

雪夜小飲贈夢得

同爲懶慢園林客共對蕭條雨雪天小酌
酒巡銷永夜大開口笑送殘年久將時背

成遣老多被人呼作散仙呼作散仙應有
以曾看東海變桑田

歲暮夜長病中燈下聞盧尹夜宴以
詩戲之且爲來日張本也

榮鬧興多嫌晝短衰閑睡久覺明遲當君
秉燭銜盃夜是我停燈服藥時枕上愁吟
堪發病府中歡笑勝尋醫明朝強出須謀
樂不誑車公更誑誰

病中數會張道士見譏以此答之

亦知數出妨將息不可端居守寂寥病即
藥窻眠盡日興來酒席坐通宵賢人易狎
須勤飲姹女難禁莫謾燒張道士輸白道
士一盃沆瀣便逍遙

卯飲

短屏風掩卧牀頭烏帽青氈白氎裘卯飲
一盃眠一覺世間何事不悠悠

寄題餘杭郡樓兼呈裴使君

官歷二十政宦遊三十秋江山與風月最

憶是杭州北郭沙堤尾西湖石岸頭綠觴
春送客紅燭夜回舟不敢言遺愛空知念
舊遊憑君吟此句題向望濤樓

楊六尚書留太湖石在洛下借置庭
中因對舉盃寄贈絕句

借君片石意何如置向庭中慰索居每就
玉山傾一酌興來如對醉尚書

喜入新年自詠

白鬚如雪五朝臣又入新正第七旬老過

占他藍尾酒病餘收得到頭身銷磨歲月
成高位比類時流是幸人大曆年中騎竹
馬幾人得見會昌春

灘聲

碧玉斑斑沙歷歷清流泱泱響泠泠自從
造得灘聲後玉管朱絃可要聽

老題石泉

殷勤傍石遶泉行不說何人知我情漸恐
耳聾兼眼暗聽泉看石不分明

送王卿使君赴任蘇州因思花迎新
使感舊遊寄題郡中木蘭西院一別
一別蘇州十八載時光人事隨年改不論
竹馬盡成人亦恐桑田變爲海鶯入故宮
含意思花迎新使生光彩爲報江山風月
知至今白使君猶在

出齋日喜皇甫十早訪

三旬齋滿欲銜盃平旦敲門門未開除却
朗之携一榼的應不是別人來

會昌二年春題池西小樓

花邊春水水邊樓一坐經今四十秋望月
橋傾三遍換採蓮船破五迴修園林一半
成喬木鄰里三分作白頭蘇李冥濛隨燭
滅陳樊漂泊逐萍流雖貧眼下無妨樂縱
病心中不與愁自笑靈光巋然在春來遊
得且須遊

酬南洛陽早春見贈

物華春意尚遲迴賴有東風晝夜催寒繼

柳膏收未得暖熏花口噤初開欲披雲霧
聯襟去先喜瓊瑤入袖來久病長齋詩老
退爭禁年少洛陽才

對新家醞翫自種花

香麴親看造芳叢手自栽迎春報酒熟垂
老看花開紅蠟半含萼綠油新醱醅玲瓏
五六樹漱灑兩三盃恐有狂風起愁無好
客來獨酣還獨語待取月明迴

携酒往朗之拜居同飲

慵中又少經過處別後都無勸酒人不挈
一壺相就醉若爲將老度殘春

以詩代書酬慕巢尚書見寄

書意詩情不偶然苦云夢想在林泉願爲
愚谷烟霞侶思結空門香火緣每愧尚書
情眷眷自憐居士病緜緜不知待得心期
否老校於君六七年

春盡日

芳景銷殘暑氣生感時思事坐含情無人

開口共誰語有酒回頭還自傾醉對數叢
紅芍藥渴嘗一盃綠昌明春歸似遣鶯留
語好住林園三兩聲

招山僧

能入城中乞食否莫辭塵土污袈裟欲知
住處東城下遶竹泉聲是白家

夏日與閑禪師林下避暑

落景墻西塵土紅伴僧閑坐竹泉東綠蘿
潭上不見日白石灘邊長有風熱惱漸知

隨念盡清涼常願與人同每因毒暑悲親
故多在炎方瘴海中

題新澗亭兼訓寄朝中親故見贈

何處披襟風快哉一亭臨澗四門開金章
紫綬辭胥去白石清泉就眼來自得所宜
還獨樂各行其志莫相哈禽魚出得池籠
後縱有人呼可更迴

病中看經贈諸道侶

右眼昏花左足風金篦石水用無功不如

廻念三乘樂便得浮生百疾空無子同居
草菴下有妻偕老道場中何煩更請僧爲
侶月正新歸伴病翁

遊豐樂招提佛光三寺

竹鞋葵扇白綃巾林野爲家雲是身山寺
每遊多寄宿都城暫出即經旬漢容黃綺
爲逋客堯放巢由作外臣昨日制書臨郡
縣不該愚谷醉鄉人

醉中得上都親友書以予停俸多時

憂問貪乏偶乘酒興詠而報之

頭白醉昏昏狂歌秋復春一生耽酒客五
度棄官人異世陶元亮前生劉伯倫卧將
琴作枕行以鋪隨身歲要衣三對年支穀
一困園葵烹佐飯林葉掃添薪沒齒甘蔬
食搖頭謝搢紳自能拋爵祿終不惱交親
但得盃中渌從生甌上塵煩君問生計憂
醒不憂貧

池畔逐涼

白集六十九
五十九
風清泉冷竹脩脩三伏炎天涼似秋黃犬
引迎騎馬客青衣扶下釣魚舟衰容自覺
宜閑坐蹇步誰能更遠遊料得此身終老
處只應林下與灘頭

池鶴八絕句

雞贈鶴

一聲警露君能薄五德司晨我用多不會
悠悠時俗士重君輕我意如何

鶴答雞

爾爭伉儷泥中鬪吾整羽儀松上棲不可
遣他天下眼却輕野鶴重家雞

烏贈鶴

與君白黑太分明縱不相親莫見輕我每
夜啼君怨別玉徽琴裏忝同聲

鶴答烏

吾愛棲雲上華表汝多攫肉下田中吾音
中羽汝聲角琴曲雖同調不同

鳶贈鶴

白集卷十九
三十一
君誇名鶴我名鳶君叫聞天我唳天更有
與君相似處飢來一種啄腥羶

鶴答鳶

無妨自是莫相非清濁高低各有歸
羶鶴
群中彩雲裏幾時曾見喘鳶飛

鵝贈鶴

君因風送入青雲我被人驅向鴨群
雪頸
霜毛紅網掌請看何處不如君

鶴答鵝

右軍歿後欲何依只合隨雞逐鴨飛
未必
犧牲及吾輩大都我瘦勝君肥

談氏小外孫王童

外翁七十孫三歲笑指琴書欲遣傳
自念
老夫今耄矣因思稚子更茫然
中郎餘慶
鍾羊枯子幼能文似馬遷
才與不才爭料
得東床空後且嬌憐

送後集往廬山東林寺兼寄雲臯上
人

後集寄將何處去故山迢遞在匡廬舊僧
獨有雲臯在三二年來不得書別後道情
添幾許老來筋力又何如來生緣會應非
遠彼此年過七十餘

客有說

近有人從海上回海山深處見樓臺中有
佛龕虛一室多傳此待樂天來

答客說

吾學空門非學仙今君比說是虛傳海山

不是吾歸處歸即應歸兜率天

哭劉尚書夢得二首

四海齊名白與劉百年交分兩綢繆同貧
同病退閑日一死一生臨老頭盃酒英雄
君與操文章微婉我知立賢豪雖歿精靈
在應共微之地下遊

今日哭君吾道孤寢門淚滿白髭鬚不知
箭折弓何用兼恐脣亡齒亦枯窅窅窮泉
埋寶玉駸駸落景掛桑榆夜臺暮齒期非

遠但問前頭相見無

白氏文集卷第六十九





不 許 複 製

NOT TO BE REPRODUCED

東京大学東洋文化研究所